

狩野教授還曆記念支那學論叢抽印

擬 策 一 道

姚名達先生

內 藤 虎 次 郎

擬策一道

內藤虎次郎

嘗讀陳仲魚對策愛其博瞻欲一效鑿在苒未果癸亥冬爲麗澤社同人發策問三道亦未自置對  
頃因狩野博士明年華甲一周諸友胥謀各作論一篇以代譯言徵文及余乃就前年策問中論杜  
君卿書者擬作對策一道以應之以場屋之體行考古之論專主遠意無遑刪潤文之工拙所不計  
焉丁卯十二月 日

問杜君卿以巨唐名相繼述作之才通典一書稱爲唐以前掌故之淵海其撰述始末與體製旨趣試論  
其略歟四庫提要譏其徵引閒有挂漏分門稍涉繁冗而取其元元本本爲有用之質學往往有補經訓  
凡其所抑揚是否得當方之鄭略馬考其所以卓爾不羣者安在君卿又刪其要爲理道要訣朱子評謂  
非古是今之書今其書已亡其佚在於何時其體製尙有可徵者歟其佚文存於他書者能舉其一二歟  
朱子所評後儒所議皆中其病歟其各就所見而暢言之

對論述作於司馬子長劉子政之後莫唐杜君卿若焉君卿之書今傳通典據舊唐書紀傳貞元十七年  
十月庚戌在淮南節度使任時使人詣闕表進其書唐會要以爲貞元十九年二月撰上蓋誤進理道要  
訣時爲通典撰上之日王伯厚玉海引中興書目謂貞元十年表上者亦非也李瀚序其書云淮南元戎

擬策一道

一

MG  
K242.07  
1



3 1761 2463 8

之佐曰尚書主客郎京兆杜公君卿大曆之始實纂斯典累年而成按君卿佐淮南節度使韋元甫幕而元甫卒於大曆六年見舊唐書則通典殺青早在大曆中而討論潤色至貞元十七年方上之也初開元末左監門衛錄事參軍劉秩探樞經史百家之言俾周禮六官所職撰分門書卅五卷號曰政典房韞稱爲才過劉更生君卿得其書尋味厥旨以爲條目未盡因而廣之參益開元新禮成書二百卷是其制作所由參攷新舊唐書可知劉秩論議亦尙存其中矣君卿上表出舊書有云孝經尙書毛詩周易三傳皆父子君臣之要道十倫五教之宏綱百王是式終古攸遵然多記言罕存法制每念愷學莫探政經略觀歷代衆賢著論多陳紊失之弊或闕匡拯之方臣既庸淺寧詳損益未原其始莫暢其終尙賴周氏典禮秦皇蕩滅不盡縱有繁雜且用準繩至於往昔是非可爲來今龜鏡布在方冊亦粗研尋自頃續述年踰三紀圖籍寔多事目非少是自述其體製之要并道其用功之久大曆元年至貞元十七年實累三紀吳氏郡齋讀書志謂凡三十六年成書者是也若夫君卿述作之旨在徵諸人事施於有政如自序所言雖采萃言至精至粹刊列百度緝熙王猷非俯文御覽玉燭藝文之類主文章記問者比亦如李瀚所言其論中丁稱高顯輕稅之法功規蕭葛道亞伊呂建中兩稅賦有常規其論輕重舉太公管仲李悝商鞅蘇綽高顯爲六賢推柔弘羊耿壽昌之事有成績其論選舉謂試官以帖問求學錄曹以書判擇吏帖經者童稚之事書判又文詞之末其論職官譏唐制之複冗二卑陶二垂二契二伯夷二伯益四伯閻六十將軍之設舊名不廢新職口加十羊九牧疲吏煩衆其論兵美漢氏之強幹弱枝擬唐藩之極寵增驕其論刑進子產之鑄刑觀宜紕叔向之開誼行禮並皆所見以經邦致用爲根抵取濟世務異於世俗溝渚之儒墨守往訓空談道德者焉若其論禮論邊防謂中華古制樸質類今之夷狄有祭立尸焉有以人殉葬

焉有葬無封樹焉有茹毛飲血焉有手搏食焉有巢居穴處焉有同姓婚焉有不諱名焉惟其地而氣正人性和而才慧繼生聖哲漸革鄙風或是古者猶言祭尸禮重亦可習之豈非滯執是則君卿心知世運之日進由朴而之文勢之必至在禹域學者尤爲超世獨見蓋上下二千年無此卓識矣四庫全書提要議其所徵引閉有注漏分門子目稍涉繁冗補訂剝正至十數條確則確矣於其撰述大誼要非所急其引羣經多存舊話頗殊今疏提要以爲有補經訓然如此之類乃先唐古書存于今者往往所有亦惟偶爾探撫非有意保殘未足以此爲著作輕重也若乃食貨門輕重引管子國蓄山至數諸篇其注多今本所無君卿自言此篇經秦焚書潛蓄人間自漢與晁賈桑耿諸子猶有言其術者其後絕少尋覽無人注解或編斷簡蠶或傳訛寫謬年代綿遠詳正莫由今且梗槩粗知固難得搜摘其文字凡問古人之書蓋欲發明新意隨時制事其道無窮而況機權之術千變萬化若一二櫟楮則同膠柱刻舟耳他皆類此是知時變達人情爲學精要如君卿而方能之非爾來注家字櫛句梳箋釋蟲魚者所企及新唐志法家載君卿管子指略二卷蓋君卿亦於法家言素所通曉此之不舉徒拾碎義雖益於搜逸竟非典要提要之讓評古書動失抑揚之常有如此者鄭略馬考以此書爲藍本而鄭變爲考史之學讎討辯博雖存別裁要爲書生鉛槧之業馬則策學決科之餘習排比類事雖加詳贍無當於述作之道方之君卿之書館鑄經史度古行今發明新意非其倫已至於理道要訣十卷唐宋藝文志並收雜家陳季立世善堂書目載在各家傳世名書則其書之佚在明季以後如翁元圻所考直齋書錄解題謂書凡三十三篇皆設問答之辭末二卷記古今異制蓋於通典中撮要以便人主觀覽玉海又刪錄君卿表序其表云竊思理道不錄空言由是累紀俯纂通典包羅千件事探討盡法刑政遂成二百卷先已奉進從去年春末更於二

百卷中纂成十卷曰理道要訣凡三十三篇詳古今之要酌時宜可行貞元十九年二月十八日上其自序云隋季文博理道集多主於規諫而略於體要臣頗探政理竊究始終假問答方彙發明第一至第三食貨四選舉命官五禮教六封建州郡七兵刑八邊防九十古今異制議是其體製之可徵者困學紀聞五卷引其書謂周人尙以手搏食三代之制祭立尸以入殯非今戎狄尙有之中華久絕又六卷引自古至商子孫不諱祖父之名周制方諱夷狄皆無諱乃通典論禮論邊防之意又四卷引宋光祿大夫傅隆年過七十手寫籍書是其佚文存於他書者按季文博治道集箸錄新唐志法家久已佚亡及于近時忽出於敦煌石室今藏巴黎國民圖書館經余攝影錄出併觀要訣知其書出於藍矣玉海又謂權文公德輿以要訣之作爲經章罔議錯綜古今經世立言之旨備焉同時名公推尊至此而朱子語類則謂非古是今之書然朱子異時亦謂通典亦自好設一科則其評要訣非必爲貶詞後儒不達罔若璿以立尸乃古法外裔猶存何焯又謂讀曾子問知君卿論立尸之謬且難朱子之不引經以折之是已不解君卿聖哲繼生鄙風漸改之義又不通朱子評君卿之意也論世論人究往哲之宏旨難矣

87

4. 5. 7. 9.

625  
41